

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2016-imik, ataani allassimatut oqaasertalimmik, Inatsisartut tapersiinnissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalackersuisunut kaammattuutigaa siunnersuisoqatigiiffiup Issittumi Siunnersuisoqatigiinnut alaatsinaatsutut inissisimalernissaannik qinnuteqaataanik tapersersueqqullugit.

(Aallartitat siulittaasuat Lars-Emil Johansen)

Akissuteqaat

(Inuusutissarsiornermut, Suliffeqarnermut, Niuernermut Nunanullu Allanut Naalackersuisoq)

1. Siullermeerneqarnera

Aallarniutigalugu Naalackersuisut sinnerlugit qunjaniarpunga aallartitat siulittaasuat Lars-Emil Johansen aalajangiiffigisassatut siunnersuuteqarsimammat.

Naalackersuisut paasisimavaat nunani avannarlerni killerni inatsisilerinikkut suliallit Nunat Avannarliit Killiit Siunnersuisoqatigiiffianniittut Issittumi Siunnersuisoqatigiinni alaatsinaatsuunissamik kissaateqartut aammalu nunani avannarlerni killerni naalackersuisut inatsisartullu akornanni suleqatigiinnerit ingerlareersut ineriartorteqqinnissaannik kissaateqartut.

Naalackersuisut Issittumi Siunnersuisoqatigiit nunani sanilerisatsinni qaninnerpaani pingaarnertut suleqatigisaraat. AEPS-imi siusinnerusukkut suleqatigiiffiusumi Issittumi Siunnersuisoqatigiinni ministerit ataatsimiittarnerat avatangiisinut ministerit issittumi naalagaaffiiniit arfineq-pingasuneersut amerlanertigut peqataatillugit ingerlanneqartaraluarpoq. Massakkut ukioq allortarlugu ministerit ataatsimiittarneranni nunanut allanut ministerit tamakkerlutik peqataasarput, nunallu allat nutaat alaatsinaatsutut akuerineqarnissartik utaqqiinnarpaat. Inissat taakkua piumaneqaat.

Massakkummi oqaluuserineqarlutik sammineqartartut avatangiisinuinnaq tunngassuteqarneq ajorput, Issittumili inuttut inuunitsinnut attuumassuteqartarlutik. Tamannalu tunngavigalugu issittumi suleqatigiittoqarnera Kalaallit Nunaannut pingaaruteqartorujussuvoq.

Nunat allat Issittumik soqutigisaqarnerisa annerusumik Kalaallit Nunaata aningaasarsiornikkut periarfissaqarneranut iluaqutaalernissaasa qulakkeernissaat Naalackersuisunut assut pingaaruteqarpoq. Ineriartornermi Kalaallit Nunaannut iluaqutaassappat sulilluartoqarnissaa pingaaruteqarluinnarpoq. Tassunga atatillugu pingaaruteqarpoq Kalaallit Nunaata issittumi suleqatigiittoqarnerani sulinera politikkimut Nunatsinni isumaqataaffigineqartumut naapertuuttariaqarmat, Issittumilu Siunnersuisoqatigiinni issittoq pillugu pingaarnertigut suleqatigiittoqarnerani Naalackersuisut peqataanissaanni Inatsisartut Nunanut Allanut Sillimaniarnermullu Ataatsimiititaliaanik attaveqartarnissaq eqqarsaatigalugu.

Sammineqartussat ataasiakkaat isummerfiginngikkaluarlugit isumaqarnarpoq issittumi suleqatigiittoqarneratigut aamma nunani avannarlerni killerni suleqatigiittoqarneratigut sammineqartutigut pingaarutilinnik sammisassaartoq, massakkullu Nunat Avannarliit Killiit

Siunnersuisoqatigiiffiata Issittumi Siunnersuisoqatigiinni alaatsinaatsuulernissamik qinnuteqarusunnerat tupinnanngilaq. Taamaaliornikkut Nunat Avannarliit Killiit Siunnersuisoqatigiiffiat Issittumi Siunnersuisoqatigiinni naalackersuinikkut suleqatigiittoqarneranut pitsaannerusumik ilisimatinneqarsinnaalissaaq.

Inatsisartulli aalajangiiffigisassatut siunnersuummut saqqummiunneqartumut isumaqataaniarpata Naalackersuisut isumaat malillugu, inassuteqaatillu Issittumi Siunnersuisoqatigiinnut ingerlateqqinnginnerani, Islandimi Altinget aamma Savalimmiuni Lagtinget paasiniaaffigisariaqassapput qanoq aalajangersakkamut isumaqarnersut paasiniallugu. Naalackersuisullu tassunga atatillugu isumaqarput nunani avannarlerni killerni suleqatigiinnermi nunat allat aalajangersakkamut isumaqataasinnaassanngippata aalajangersakkap atuutisilernissaa pisariaqassanngitsoq.

Aammattaaq isiginiartariaqarpoq aalajangersakkamik atuutilersitsineq sulisunik allatut pingaarnersiuisoqarnissaanik kinguneqariaannaamat, naalackersuinikkut allaffissornikkullu.

Taamatut oqaaseqarlunga aalajangiiffigisassatut siunnersuut Inatsisartunut suliassanngorlugu tunniuppara.